

BOSNA I HERCEGOVINA
PARLAMENTARNA SKUPŠTINA
PREDSTAVNIČKI DOM

Broj: 01-011-40/00.

Datum: 13.04.2000.

Z A P I S N I K

sa 18. sjednice Predstavničkog doma Parlamentarne skupštine
Bosne i Hercegovine

Osamnaesta sjednica Predstavničkog doma sazvana je za 7. mart 2000. godine. Tada se pozivu da prisustvuje sjednici odazvalo 17 poslanika - 15 iz Federacije BiH i 2 iz Republike Srpske.

Iz Federacije BiH odsustvovali su: Raifa Alagić, Edhem Bičakčić, Tarik Čaršimamović, Alma Čolo, Mediha Filipović, Adnan Jahić, Safet Oručević, Haris Silajdžić, Ivo Mijačević, Sejfudin Tokić, Ljubomir Zovko i Anita Mikulić. Iz Republike Srpske odsutni su bili svi srpski poslanici. Predsjedavajući Pero Skopljak otvorio je 18.sjednicu i, nakon intoniranja Himne, konstatovao da nema uslova za rad sjednice zbog nedostatka kvoruma. Pročitao je obavještenje kojim su poslanici srpske nacionalnosti iz Republike Srpske predsjedavajućeg obavijestili da ne mogu doći na sjednicu Doma dok se ne razjasni bezbjednosni aspekt njihovog boravka na teritoriji Federacije BiH, što je uslijedilo zbog izjave predsjedavajućeg Predsjedništva BiH i predsjednika Stranke demokratske akcije g. Alije Izetbegovića, objavljene u listu "Dnevni avaz" od 4.marta 2000.godine.

Ovim je predsjedavajući završio rad prvog dijela 18. sjednice.

Drugi dio 18. sjednice održan je 22.marta. Prisustvovao je 31 poslanik - iz Republike Srpske 13 i iz Federacije BiH 18. Odsustvovali su: Raifa Alagić, Edhem Bičakčić, Nedžad Branković, Hamdija Kulović, Hilmo Neimarlija, Safet Oručević. Ivo Mijačević i Munira Karić.

Predsjedavajući Pero Skopljak upoznao je poslanike da nije održan sastanak Kolegija sa predsjednicima poslaničkih klubova, jer nije bilo kvoruma, te da zbog toga nije sa njima usaglašen prijedlog dnevnog reda koji je predložio Kolegij. Zatim je otvorio raspravu o prijedlogu dnevnog reda.

U diskusiji i replikama povodom predloženog dnevnog reda učestvovali su: Miodrag Deretić, Ibrahim Spahić, Nikola Špirić, Halid Genjac, Ana Havel, Rasim Kadić, Mirko Banjac, Vito Rakić, Haris Silajdžić, Branko Dokić, Adnan Jahić, Mara Perkanović, ministar Jadranko Prlić, Zlatko Lagumdžija, Desanka Rađević, Branislava Jovanović, Mirko Baković i Ivo Divković.

Poslije rasprave o prijedlogu dnevnog reda g.Halid Genjac je predložio da Dom verifikuje mandat novom poslaniku Hamdiji Kuloviću umjesto Alme Čolo, koja je podnijela ostavku na dužnost poslanika zbog nespojivosti funkcija.

Predstavnički dom je prihvatio ovaj prijedlog i verifikovao mandat novom poslaniku g. Hamdiji Kuloviću, nakon čega je on pred Domom dao svečanu zakletvu.

Predsjedavajući je, nakon svečane zakletve, dao pauzu radi održavanja sjednice Kolegija sa predsjednicima poslaničkih klubova i predstavnicima stranaka koje nemaju klubove, kako bi se usaglasio dnevni red za sjednicu.

Nakon pauze Dom se izjasnio o prijedlozima za dopunu ili izmjenu predloženog dnevnog reda.

Prijedlog poslanika Miodraga Deretića, da se u dnevni red uvrsti donošenje zaključka u vezi sa izjavom Alije Izetbegovića, nije usvojen. ZA prijedlog je glasalo 16 od 29 prisutnih poslanika. Prijedlog nije dobio entitetsku većinu iz Federacije BiH (5 poslanika glasalo ZA).

U vezi sa prijedlozima Ibrahima Spahića, Kolegij je zauzeo stav da se rasprava o Paktu stabilnosti može voditi u okviru 8. tačke predloženog dnevnog reda. U vezi sa raspravom o ekonomskoj i socijalnoj politici zauzet je stav da kolegiji oba doma, najkasnije za sedam dana, obave dogovor oko održavanja posebne sjednice posvećene ovoj temi.

Dom je, sa 27 glasova ZA, usvojio prijedlog g. Špirića da se u dnevni red uvrsti rasprava o sudbini poslanika Ibrahima Đedovića.

Prijedlog g.Špirića, da se u dnevni red uvrsti Analiza dosadašnjeg rada Nezavisne komisije za medije, nije usvojen jer nije dobio entitetsku većinu - iz Federacije BiH glasalo je 6, a iz Republike Srpske 11 poslanika.

Povodom prijedloga g. Halida Genjca, da se u dnevni red uvrsti razmatranje svih prijedloga zakona o Savjetu ministara, predsjedavajući je obavijestio poslanike da je Kolegij zauzeo stav da se u roku od 7 dana održi zajednička sjednica kolegija oba doma radi usaglašavanja stavova o Zakonu o Vijeću ministara.

Povodom prijedloga g. Lagumdžije, da se razmatra Informacija o pripremama Bosne i Hercegovine za novi donatorski ciklus i o realizaciji projekata o Paktu stabilnosti za Jugoistočnu Evropu, u svjetlu odnosa sa međunarodnim finansijskim organizacijama, Kolegij je zauzeo stav da se ova inicijativa uputi Predsjedništvu BiH da pripremi materijal.

U vezi sa prijedlogom g. Silajdžića, da se u dnevni red uvrsti 20 prijedloga zakona čiji je on predlagač, a koje je dostavio još u avgustu mjesecu 1999.godine, Kolegij je zauzeo stav da se ti prijedlozi zakona upute u proceduru Komisiji za ustavna i pravna pitanja.

Pošto se dom izjasnio o prijedlozima za dopunu dnevnog reda, diskutovali su Nikola Špirić, Haris Silajdžić, Zlatko Lagumdžija, Vito Rakić, a poslije ovih diskusija i dosta replika, predsjedavajući je dao na glasanje i prijedlog g.Silajdžića, da se u dnevni red uvrste njegovi prijedlozi zakona.

ZA prijedlog je glasalo 11, a protiv prijedloga 16 poslanika. Prijedlog nije usvojen jer nije dobio većinu prisutnih poslanika. Potom se Dom izjasnio o prijedlogu dnevnog reda ucjelini.

Sa 22. glasa ZA (iz FBiH 10, iz RS 12), za 18. sjednicu Predstavničkog doma usvojen je sljedeći

DNEVNI RED:

1. Glasanje po entitetima o Nacrtu izbornog zakona - predlagač klub poslanika SDP,
2. Glasanje po entitetima o Prijedlogu zakona o Vijeću ministara – predlagači S.Tokić i I.Divković,
3. Izvještaj Komisije Kolegija o nastojanju za postizanje saglasnosti:

- a) o prijedlogu zaključka poslanika Zlatka Lagumdžije u vezi s Nacrtom izbornog zakona BiH (predlagač delegat Drago Ljubičić),
- b) o amandmanu poslanika Miodraga Deretića na Prijedlog zakona o javnim ispravama,
4. Glasanje o integralnom tekstu Prijedloga zakona o javnim ispravama,
5. Prijedlog budžeta institucija BiH i međunarodnih obaveza BiH za 2000.godinu, sa Prilogom uz Budžet za 2000.godinu,
6. Prijedlog zakona o izvršenju Budžeta institucija BiH i međunarodnih obaveza BiH za 2000.godinu,
7. Nacrt izbornog zakona Bosne i Hercegovine (predlagač Klub poslanika HDZ),
8. Informacija Predsjedništva Bosne i Hercegovine o realizaciji obaveza BiH u vezi sa Paktom stabilnosti za Jugoistočnu Evropu,
9. Inovirani izvještaj o ispunjenju uslova za prijem BiH u Vijeće Evrope
10. Realizacija plana Međunarodnog fonda za deminiranje i pomoć žrtvama mina u BiH ,
11. Davanje saglasnosti za ratifikaciju:
 - a) Bilateralnog sporazuma između BiH i Velike Socijalističke Narodne Libijske Arapske Džamahirije o podsticanju i zaštiti investicija,
 - b) Bilateralnog sporazuma između BiH i Velike Socijalističke Narodne Libijske Arapske Džamahirije o formiranju mješovitog komiteta,
 - c) Bilateralnog sporazuma između BiH i Velike Socijalističke Narodne Libijske Arapske Džamahirije o naučnoj, tehnološkoj i kulturnoj saradnji,
 - d) Sporazuma o trgovinsko-privrednim odnosima i saradnji između BiH i Vlade Republike Mađarske,
 - e) Sporazuma o ekonomskoj, tehničkoj i naučnoj saradnji između BiH i Arapske Republike Egipat,
 - f) Sporazuma o zajmu od 12. marta 1999. za SEK 34.500.000 između BiH i Vlade Švedske,
 - g) Konvencije o kontroli prekograničnog prometa opasnog otpada i njegovom odlaganju
12. Potvrđivanje imanovanja glavnog revizora i zamjenika,
13. Rasprava o statusu poslanika Ibrahima Đedovića,
14. Odgovori na poslanička pitanja i pitanja poslanika.

Ad - 1: Glasanje po entitetima o Nacrtu izbornog zakona
(predlagač: Klub poslanika SDP-a)

Predsjedavajući je podsjetio poslanike da je ovo prvi krug glasanja, a da treba obaviti samo glasanje po entitetima, te da se uzdržani poslanici računaju samo u kvorum, ali ne i u one koji glasaju.

Poslanik Desanka Rađević je prigovorila da prilikom glasanja o Nacrtu ovog zakona na 16. sjednici, kojom prilikom je obavljeno glasanje prozivkom, nije konstatovan tačan rezultat, jer je evidentno da je, kad se prebroje glasovi, ZA glasalo 12 i PROTIV 12 poslanika, a ne ZA 12, a protiv 11, kako je konstatovao predsjedavajući. Naglasila je da ta činjenica suštinski mijenja situaciju u pogledu izjašnjavanja o ovom nacrtu zakona po entitetima.

Predsjedavajući Pero Skopljak je ipak dao Nacrt na entitetsko glasanje.

ZA Nacrt zakona iz Federacije BiH glasalo je 11 poslanika, a 5 je glasalo PROTIV.

Iz Republike Srpske 1 poslanik je glasao ZA, a 11 ih je glasalo PROTIV.
Predsjedavajući je konstatovao da Nacrt izbornog zakona BiH (predlagač: Klub poslanika SDP-a) nije dobio entitetsku većinu i da ide na usaglašavanje.

Ad - 2: Glasanje po entitetima o Prijedlogu zakona o Vijeću ministara (predlagači poslanici: S. Tokić i I. Divković)

ZA Prijedlog zakona iz Republike Srpske glasala su 2 poslanika, a 11 je glasalo PROTIV. Iz Federacije BiH ZA Prijedlog zakona glasalo je 11, a 5 poslanika glasalo je PROTIV.

Predsjedavajući je konstatovao da Prijedlog zakona nije dobio entitetsku većinu iz RS, pa da ide na usaglašavanje.

Ad - 3: Izvještaj Komisije Kolegija:

- a) o prijedlogu zaključka poslanika Zlatka Lagumdžije u vezi s Nacrtom izbornog zakona BiH (predlagač delegat Drago Ljubičić),
- b) o Amandmanu poslanika Miodraga Deretića na Prijedlog zakona o javnim ispravama

a) Predsjedavajući je podsjetio da se radi o drugom krugu glasanja, gdje je predmetni akt usvojen ukoliko PROTIV istog nije glasalo 2/3 poslanika iz nekog od entiteta.

PROTIV prijedloga zaključka poslanika Zlatka Lagumdžije iz Federacije BiH glasalo je 6 poslanika, a iz Republike Srpske PROTIV je glasalo 11 poslanika.

Predsjedavajući je konstatovao da Prijedlog zaključka nije usvojen.

b) PROTIV amandmana poslanika Miodraga Deretića na Prijedlog zakona o javnim ispravama, iz Federacije BiH glasalo je 10 poslanika, a iz Republike Srpske jedan poslanik.

Predsjedavajući je konstatovao da je amandman usvojen i da je postao sastavni dio Prijedloga zakona o javnim ispravama.

Ad - 4: Glasanje o integralnom tekstu Prijedloga zakona o javnim ispravama

ZA Prijedlog zakona glasalo je 16 poslanika, a 9 ih je glasalo protiv.

Glasajući po entitetima, iz Republike Srpske ZA Prijedlog je glasalo 11 poslanika, a dva poslanika su glasala protiv.

Iz Federacije BiH 5 poslanika glasalo je ZA, a 9 PROTIV.

Predsjedavajući je konstatovao da Prijedlog zakona nije dobio entitetsku većinu iz Federacije BiH i da ide na usaglašavanje.

Ad - 5: Prijedlog Budžeta institucija BiH i međunarodnih obaveza BiH za 2000. godinu, sa Prilogom uz Budžet za 2000.

Ministar za civilne poslove i komunikacije, g. Marko Ašanin, podnio je izjašnjenje o primjedbama i amandmanima na Prijedlog budžeta. Predsjedavajući Komisije za Budžet i finansije, g. Nikola Špirić, podnio je izvještaj te komisije.

U diskusiji su učestvovali Suada Muminagić i Nikola Špirić, a na pitanja postavljena u diskusiji odgovorio je ministar Marko Ašanin.

Predstavnički dom je usvojio Budžet institucija BiH i međunarodnih obaveza BiH za 2000. godinu.

ZA je glasao 21 poslanik, a 2 su glasala PROTIV. Po entitetima, iz RS 11 poslaniak glasalo je ZA, a iz Federacije BiH ZA je glasalo 11, a 2 PROTIV.

Ad - 6: Prijedlog zakona o izvršenju Budžeta institucija BiH i međunarodnih obaveza BiH za 2000. godinu

Ministar Marko Ašanin je iznio stav o amandmanima.

Diskutovali su Suada Muminagić i Nikola Špirić.

Predstavnički dom je jednoglasno (25 prisutnih poslanika) usvojio Zakon o izvršenju Budžeta institucija BiH i međunarodnih obaveza BiH za 2000. godinu.

Ad - 7: Nacrt izbornog zakona BiH (predlagač: Klub poslanika HDZ-a)

Obrazloženje Nacrta zakona podnijela je poslanik Ana Havel.

O Nacrtu zakona diskutovao je poslanik Miodrag Deretić, a potom se Dom izjasnio o Nacrtu.

Od 22 prisutna poslanika ZA Nacrt je glasalo 13, a PROTIV 8 poslanika. Iz Federacije BiH ZA je glasalo 5, a 7 PROTIV. Iz Republike Srpske 8 poslanika je glasalo ZA, a jedan protiv.

Predsjedavajući je konstatovao da je Nacrt dobio većinu prisutnih, ali ne i entitetsku većinu, te da ide na usaglašavanje.

Ad - 8: Informacija Predsjedništva BiH o realizaciji obaveza BiH u vezi sa Paktom stabilnosti za Jugoistočnu Evropu

Predsjedavajući je primijetio da sjednici nije prisutan predstavnik Predsjedništva BiH, pa je o informaciji otvorio raspravu.

Poslanik Nikola Špirić je u svojoj diskusiji izrazio negodovanje zbog odsustva predstavnika Predsjedništva kad se na Domu raspravlja o ključnim pitanjima za Bosnu i Hercegovinu. Istakao je da to nije prvi put. Predložio je da se zbog toga ova tačka skinе sa dnevnog reda.

U vezi sa Informacijom obrazloženje je podnio ministar insotranih poslova g. Jadranko Prlić.

Predsjedavajući Pero Skopljak je konstatovao da je ministar Prlić svojim izlaganjem referisao istovremeno i o 9. tački - Inovirani izvještaj o ispunjenju uslova za prijem BiH u Vijeće Evrope, što je ministar i potvrdio.

Što se tiče prijedloga g.Špirića, predsjedavajući je predložio da Dom Predsjedništvu uputi apel i prigovor zbog nedolaska na sjednice Doma, a da predmetnu informaciju primi k znanju.

Poslanik Špirić se zahvalio minsitru Prliću na iscrpnom izlaganju i njegovoj spremnosti da Predstavnički dom uvijek informiše o pitanjima iz svoje nadležnsoti. Međutim, istakao je da je situacija veoma ozbiljna i da bi Predsjedništvo trebalo da smogne snage i da Parlament barem u dva-tri mjeseca informiše šta je od uslova, vezano za Pakt stabilnosti za Jugoistočnu Evropu, ispunjeno. Rekao je, pored ostalog, da on smatra da Informacija nije ni raspravljana dok neko iz Predsjedništva BiH ne podnese usmeno ili pismen obrazloženje.

Ad - 9: Inovirani izvještaj o ispunjenju uslova za prijem Bosne i Hercegovine u Vijeće Evrope

U okviru ove tačke dnevnog reda diskutovali su Ibrahim Spahić, Zlatko Lagumdžija, Miodrag Deretić, Vito Rakić, Nikola Špirić, Ivo Divković, ministar Mirsad Kurtović, Mirko Banjac i ministar Jadranko Prlić.

U međuvremenu je sjednica Doma ostala bez kvoruma, pa je rad bilo neminovno prekinuti.

Ministar Mirsad Kurtović je u svojoj ponovnoj diskusiji dao sugestiju da se prilikom koncipiranja dnevnog reda kao prve tačke stavljaju ona pitanja koja su potpuno nesporna, kao što su, npr. međunarodni sporazumi koji su ponekad vezani i za rokove, a dešava se da se usvajanje prolongira zbog preduge rasprave o nekim pitanjima.

Predsjedavajući Pero Skopljak je konstatovao da se ova sugestija može prihvatiti, uz napomenu da se na dnevni red stavljaju tačke prema prioritetima.

Rad drugog dijela 18. sjednice prekinut je zbog nedostatka kvoruma.

Nastavak 18. sjednice Predstavničkog doma održan je 13.04.2000. godine. Prisustvovalo je 37 poslanika. Odsustvovali su: Edhem Bičakčić, Hamdija Kulović, Safet Oručević, Ivo Mijačević i Ljubomir Zovko.

Prije početka rada po dnevnom redu predsjedavajući je konstatovao da se radu Predstavničkog doma pridružio poslanik Ibrahim Đedović koji je iz poznatih razloga duže vremena odsustvovao iz Parlamenta.

Poslanik Ibrahim Đedović dao je pred Domom svečanu zakletvu.

Predsjedavajući mr Pero Skopljak je upoznao poslanike da je Kolegij od završetka prvog dijela 18. sjednice do danas imao aktivnosti na pripremi Prijedloga zakona o Vijeću ministara koji je sačinjen i dostavljen poslanicima. Predložio je, u ime Kolegija, da se Prijedlog ovog zakona utvrdi u dnevni red nastavka 18. sjednice, kao 13. tačka, a da se rasprava o statusu poslanika Ibrahima Đedovića skine s dnevnog reda pošto se g. Đedović uključio u rad Predstavničkog doma.

Prijedlog Kolegija je usvojen.

Poslanik Bogić Bogićević je predložio da se dnevni red proširi sa Informacijom o pripremanju BiH za novi donatorski ciklus i realizaciju projekta Pakta stabilnosti u svjetlu odnosa sa međunarodnim finansijskim organizacijama.

Predsjedavajući je skrenuo pažnju da Predsjedništvo nije dostavilo materijal, te da nisu ispunjeni uslovi za razmatranje te informacije. Rekao je da će se ista uvrstiti u dnevni red čim Predsjedništvo dostavi odgovarajući materijal. Poslanik Bogićević je prihvatio iznesene razloge.

Sjednica je nastavila rad 9. tačkom dnevnog reda.

Ad - 9: Inovirani izvještaj o ispunjenju uslova za prijem BiH u Vijeće Evrope

Poslanik Ivo Divković je zatražio da ministar inostranih poslova informiše Dom o trenutnoj poziciji BiH kad je u pitanju prijem u Vijeće Evrope.

Ministar Jadranko Prlić je informisao poslanike o poziciji BiH i uslovima koje treba ispuniti da bi bila primljena u članstvo Vijeća Evrope.

Povodom ove tačke dnevnog reda diskutovali su: Mediha Filipović, Sejfudin Tokić, Branko Dokić, Ibrahim Spahić, Nikola Špirić, Mirko Banjac, Vito Rakić, Haris Silajdžić, Adnan Jahić i Ana Havel.

Poslije diskusije usvojeni su sljedeći

ZAKLJUČCI

1. Da se za narednu sjednicu Predstavničkog doma Parlamentarne skupštine BiH pripremi Plan aktivnosti Parlamentarne skupštine na obezbjeđivanju uslova za prijem BiH u Vijeće Evrope i razmatra kao prva tačka dnevnog reda.

2. Da Parlamentarna delegacija BiH u Vijeću Evrope podnese izvještaj o svom radu i da' prijedloge za dalji nastup u Vijeću Evrope, kao i da se ubuduće svi nastupi prethodno usaglase u Komisiji za spoljnu politiku, u skladu sa Poslovníkom Predstavničkog doma Parlamentarne skupštine BiH.

3. Da se Parlamentarnoj skupštini BiH od strane Ministarstva vanjskih poslova dostavi informacija o angažovanju i predavljanju BiH u tijelima Vijeća Evrope (komisije, Vijećeovanja i dr.).

4. Da Služba Predstavničkog doma za poslanike obezbijedi prevod izlaganja gospodina Volfganga Petriča na Komisiji za politička pitanja i izlaganja drugih predstavnika međunarodnih institucija u Strazburu kao i izlaganja i informacije o nastupima predstavnika Parlamentarne skupštine Bosne i Hercegovine, Ministarstva vanjskih poslova i Predsjedništva BiH u vezi sa prijemom BiH u Vijeće Evrope.

Ad – 10: Realizacija plana Međunarodnog fonda za deminiranje i pomoć žrtvama mina u BiH

Ministar Mirsad Kurtović podnio je Domu uvodne napomene.

Diskutovali su: Suada Muminagić, Rasim Kadić, Mediha Filipović, Mirko Banjac, Branko Dokić, Ibrahim Spahić, Sejfudin Tokić i Mirsad Kurtović.

Poslije diskusije Predstavnički dom je uputio saučešće porodicama stradale djece od mina prehodnog dana i usvoji sljedeći

ZAKLJUČAK

Predstavnički dom podržava projekat realizacije Plana Međunarodnog fonda za deminiranje i pomoć žrtvama mina u Bosni i Hercegovini i apeluje na sve one koji su za isti zaduženi da ga do kraja sprovedu i preduzmu efikasne mjere zaštite, preventive i edukacije građana kako bi žrtava od mina bilo što manje.

Predstavnički dom upućuje apel da svi koji bilo šta znaju o minskim i eksplozivnim sredstvima i o njihovom postavljanju i nalaženju, to odmah prijave odgovarajućim institucijama.

Predsjedavajući je dao na glasanje i prijedlog poslanika Tokića da poslanici Predstavničkog doma po jedan mjesečni poslanički paušal daju Fondu za deminiranje.

Usvojen je zaključak da su poslanici Predstavničkog doma Parlamentarne skupštine BiH prihvatili ideju da se jedan mjesečni poslanički paušal uplati u Fond za deminiranje. Svaki poslanik će se o tome lično izjasniti na posebnom upitniku koji će pripremiti Služba.

Za zaključak su glasala 24 poslanika (prisutno 34) – iz Republike Srpske 6, a iz Federacije BiH 17.

Ad – 11: Davanje saglasnosti za ratifikaciju.....

O ovoj tački dnevnog reda nije bilo diskusije.

Izjašnjavanje je obavljeno u paketu. Sa 32 glasa ZA Predstavnički dom je dao saglasnost za ratifikaciju:

- a) Bilateralnog sporazuma između BiH i Velike Socijalističke Narodne Libijske Arapske Džamahirije o podsticanju i zaštiti investicija,
- b) Bilateralnog sporazuma između BiH i Velike Socijalističke Narodne Libijske Arapske Džamahirije o formiranju mješovitog komiteta,
- c) Bilateralnog sporazuma između BiH i Velike Socijalističke Narodne Libijske Arapske Džamahirije o naučnoj, tehnološkoj i kulturnoj saradnji,
- d) Sporazuma o trgovinsko-privrednim odnosima i saradnji između BiH i Vlade Republike Mađarske,
- e) Sporazuma o ekonomskoj, tehničkoj i naučnoj saradnji između BiH i Arapske Republike Egipat,
- f) Sporazuma o zajmu od 12. marta 1999. za SEK 34.500.000 između BiH i Vlade Švedske,
- g) Konvencije o kontroli prekograničnog prometa opasnog otpada i njegovom odlaganju.

Ad – 12: Potvrđivanje imenovanja glavnog revizora i zamjenika

O ovoj tački dnevnog reda nije bilo diskusije.

Dom je, sa 23 glasa ZA i 2 protiv (iz RS 9, a iz FBiH 13) potvrdio imenovanje:

- Ivana Miletića na dužnost glavnog revizora,
- Samira Mušovića i
- Dragana Kuline na dužnost zamjenika' glavnog revizora.

Ad – 13: Prijedlog zakona o Vijeću ministara BiH i ministarstvima BiH

Mirko Banjac je obavijestio Dom da je Komisija o ustavnim i pravnim pitanjima razamtrala Prijedlog zakona i usvojila stav da postoji ustavni osnov za donošenje Zakona. Naglasio je da Komisija nije ulazila u sadržaj Prijedloga zakona.

Predsjedavajući je konstatovao da su amandmane na Prijedlog zakona podnijeli Nikola Špirić, Miodrag Deretić, Ana Havel i Branko Dokić.

U diskusiji su učestvovali: Nikola Špirić, Miodrag Deretić, Ibrahim Spahić, Ana Havel, Haris Silajdžić, Branko Dokić, Ivo Divković, Mirko Banjac, Rasim Kadić, Nedžad Branković, Zlatko Lagumdžija, Desanka Rađević, Mara Perkanović, Vito Rakić i Tarik Čaršimamović. Poslije diskusije predsjedavajući je dao pauzu radi usaglašavanja.

Nakon pauze predsjedavajući je obavijestio poslanike da se Kolegij usaglailo da uvaži primjedbu poslanika Divkovića, te da se obavi drugi krug glasanja o Prijedlogu zakona o Vijeću ministara predlagача poslanika S. Tokića i I. Divkovića, koji na prvom dijelu 18. sjednice 22.03.2000. nije dobio entitetsku većinu, pa je išao na usaglašavanje na Komisiju Kolegija Predstavničkog doma.

Od 33 prisutna poslanika ZA Prijedlog zakona glasalo je 18. Glasajući po entitetima iz FBiH protiv su glasala 4 poslanika, a iz RS protiv je glasalo 11 poslanika.

Predsjedavajući je konstatovao da Prijedlog zakona nije usvojen.

Poslije izjašnjenja o prednjem Prijedlogu zakona nastavljen je rad na Prijedlogu zakona o Vijeću ministara predlagača poslanika – članova Kolegija Predstavničkog doma.

Mirko Banjac je u ime predlagača podnio izjašnjenje o podnesenim amandmanima, a Dom se izjasnio o amandmanima od kojih predlagači nisu odustali.

Amandman g. Špirića na čl. 3. nije usvojen – od 33 prisutna ZA je glasalo 12, a protiv 16 poslanika.

Od ostalih amandmana g. Špirić je odustao iz razloga što su vezani sa amandmanom na čl. 3.

Kolegij je prihvatio amandman br. 1 g. Deretića, da se u preambuli navede ustavni osnov za donošenje zakona.

Amandman 2. g. Deretića na čl. 6. stav 5. nije usvojen (od 33 prisutna ZA je glasalo 8, a 22 poslanika glasali su protiv).

Dom nije usvojio ni amandman g. Havel na čl. 6. stav 5. (od 33 prisutna poslanika 11 je glasalo ZA a 14 protiv).

Poslanik Dokić je odustao od 1. amandmana, a amandman 2 na čl. 38. nije usvojen (od 33 prisutna 14 poslanika glasalo je ZA, a 14 protiv).

Zatim se Dom izjasnio o Prijedlogu zakona u cjelini. Na prijedlog poslanika Desanke Rađević glasanje je obavljeno pojedinačno – prozivkom.

ZA Prijedlog zakona glasali su: Raifa Alagić, Nedžad Branković, Tarik Čaršimamović, Halid Genjac, Adnan Jahić, Hilmo Neimarlija, Ana Havel, Ivica Pašalić-Lhotak, Pero Skopljak, Mirko Baković, Abdurahman Malkić, Radenka Balta, Milenka Bošnjak, Branko Dokić, Vito Rakić, Mirko Banjac, Mara Perkanović i Desanka Rađević.

PROTIV su glasali: Mediha Filipović, Rasim Kadić, Mustafa Pamuk, Haris Silajdžić, Ibrahim Spahić, Zlatko Lagumdžija, Suada Muminagić, Ivo Divković, Ibrahim Dedović, Ivo Lozančić, Smail Bećirbašić, Miodrag Deretić i Nikola Špirić.

Od glasanja su se uzdržali: Dragan Mirković i Branislava Jovanović.

Predsjedavajući je saopštio da je od 33 prisutna poslanika, ZA Prijedlog zakona glasalo 18, a PROTIV 13 poslanika.

Iz Republike Srpske 8 je glasalo ZA, 3 PROTIV, 2 uzdržana.

Iz Federacije BiH 10 je glasalo ZA, a 10 PROTIV.

Predsjedavajući Pero Skopljak je konstatovao da je Predstavnički dom Usvojio Zakon o Vijeću ministara BiH i ministrstvima BiH.

Ad – 14: Odgovori na poslanička pitanja i pitanja poslanika

Poslanička pitanja su postavili:

Branko Dokić:

1. Po čijem nalogu određena diplomatska predstavništva po Evropi organizuju prijeme povodom 1. marta, nekog praznika BiH?

2. Ko je donio odluku da je to praznik Bosne i Hercegovine i da li diplomatska predstavništva trebaju da organizuju prijeme povodom entitetskih praznika ili državnih praznika BiH i da li su diplomatska predstavništva entitetska ili države BiH?

Ibrahim Spahić:

1. Tražim da Ministarstvo spoljne trgovine i ekonomskih odnosa na sljedećoj

sjednici Predstavničkog doma pusti u parlamentarnu proceduru dokument o ekonomskoj i socijalnoj politici u BiH koji je pripremio gospodin Mirsad Kurtović, sa posebnim akcentom na opšte siromaštvo u BiH i kategoriju stanovništva koja propada.

Miodrag Deretić:

- Ponovo zatražio odgovor na pitanja koja je ranije postavio, a nije dobio odgovore:
1. Kada će se Republici Srpskoj nadoknaditi procenat teritorije do 49%.
 2. Da li je distrikt Brčko u teritorijalnom sastavu Republike Srpske.

Smail Bećirbašić:

1. Da li je formirana zajednička komisija entiteta sa međunarodnim predstavnicima, koja bi radila po pitanju povratka izbjeglica u urbane sredine? Ako je formirana šta je do sada uradila i kome je sve podnijela izvještaj o svom radu? (Ovo je jedna od obaveza iz Njujorške deklaracije).

Desanka Rađević:

1. Do kada će se naziv Bosna i Hercegovina upotrebljavati u situacijama kada označava nešto što se odnosi na Federaciju BiH, kao npr. Televizija BiH, itd.

Sejfudin Tokić:

1. Sa koliko stanova raspolaže Parlament BiH i ko je trenutno korisnik tih stanova?

Sastavni dio ovog zapisnika je magnetogram 18. sjednice Predstavničkog doma.

PREDSJEDAVAJUĆI
PREDSTAVNIČKOG DOMA
Mr Pero Skopljak